

ԺՈՂՈՎՐԴԱԿԱՆ ՀԱՆԵԼՈՒԿՆԵՐԻ
ՄԻ ԲԱՆԻ ԱՌԱՆՁՆԱՀԱՏԿՈՒԹՅՈՒՆՆԵՐԻ ՄԱՍԻՆ

Ս. Բ. ՀԱՐՈՒԹՅՈՒՆՅԱՆ

Հանելուկները վիպական ժանրի այլաբանական բնույթի ստեղծագործություններ են: Նրանք ժողովրդական բանահյուսության հնագույն տեսակներից են և հազարամյակների ընթացքում ժողովուրդների հոգևոր կյանքում կարևոր դեր են խաղացել:

Բանահյուսական մյուս ժանրերի նման հանելուկները ևս հանդիսացել են օբյեկտիվ իրականության արտացոլման յուրահատուկ միջոց: Լինելով էպիկական ստեղծագործություն, հանելուկը տարբերվում է այդ սեռի մյուս ժանրերից (էպոս, հեքիաթ, առակ...) նրանով, որ օբյեկտիվ իրականությունը դրսևորում է ծավալով փոքր այլաբանական ու փոխաբերական սեղմ բանաձևումների մեջ, իբրև բնության և հասարակական կյանքի առանձին կողմերի գեղարվեստական մանրանկարներ: Հանելուկներում անդրադարձել են ժողովրդի պատմական ու աշխարհագրական միջավայրը, կենցաղը, սովորությունները, արտադրական գործունեության տարբեր տեսակները, աշխատանքի գործիքներն ու միջոցները, տնտեսության զանազան բնագավառները, սոցիալ-դասակարգային երևույթները և նրանց մասին ժողովրդի ունեցած բացահայտումներն ու վերաբերմունքը: Այս իմաստով էլ հանելուկները ճանաչողական ու պատմական կարևոր նշանակություն ունեն, իսկ իրենց յուրատեսակ արտահայտչաձևի պատճառով՝ ավելի բան ուշագրավ են դառնում:

Հայ ժողովուրդը աշխարհի բոլոր ժողովուրդների նման ունեցել է և ունի իր բազմապիսի մեծաքանակ հանելուկներ, որոնք մինչև վերջին ժամանակներս էլ բավարարում էին նրա հոգևոր պահանջները: Բանահյուսական այդ հետաքրքիր ժանրի ուսումնասիրությունը հայ բանագիտության կարևոր խնդիրներից է, մանավանդ, որ այն բոլորովին հետազոտված չէ և կարող է բազմակողմանի ու ամբողջական ուսումնասիրման:

* * *

Հանելուկների, իբրև ժողովրդական բանահյուսության ժանրի, սկզբնավորումը վերաբերում է խոր հնագրային: Հնագույն գրավոր հուշարձանների և բանավոր ավանդությունների մեջ պահպանված վկայությունները ցույց են տալիս, որ նրանք եղել են դիցաբանական հավատալիքների ու շրջապատի իրական աշխարհի գաղտնիքների մեկնաբանման տարածված միջոցներից: Սակայն նրանք այդ աստիճանի վրա կանգնած չեն մնացել, այլ մարդկային բանականության զարգացման հետ մեկտեղ, կորցրել են իրենց սկզբնական դերն ու արժեքը և հետզհետե վեր են ածվել զվարճախոսության սրամիտ միջոցների: Այդպիսին է հանելուկը արդի ժողովրդական բանահյուսության մեջ:

Սկզբնավորվելով իբրև առարկայական աշխարհի իրերի և երևույթների ներքին էությունը բացահայտելու ճանաչողության յուրատեսակ միջոց, հանելուկները դրսևորվել են որոշակի ձևի մեջ:

Հանելուկի «ամենապարզ և ամենահին ձևը, — գրում է գերմանացի գիտնական Ֆրիդրիխը, — հարցն է, որին պետք է պատասխան տրվի. այն անվանում ենք հարցահանելուկ (Rathselsfrage)»¹:

¹ Friedrich, Geschichte des Rathsels, Dresden, 1860, էջ 4:

Ֆրիդրիխը հանելուկների բոլոր հնարավոր ձևերը բաժանում է ութ խմբերի.

1. Հարցհանելուկ. 2. Պարզ բառահանելուկ, որն իր հերթին բաժանվում է յոթ տարատեսակների. 3. Վանկահանելուկ. 4. Տառահանելուկ. 5. Գծանկարահանելուկ. 6. Պատկերահանելուկ. 7. Խճողվածահանելուկ (Das Complicirte Rathsel) և 8. Թվահանելուկ:

Բացառությամբ առաջինի, հանելուկների մնացած ձևերը, ըստ կոթյան, ժողովրդական բանահյուսության հետ ոչ մի կապ չունեն:

Ժողովրդական հանելուկները, չնայած իրենց տարբեր դրսևորումներին, համախմբվում են մի ընդհանուր ոճական ձևի տակ, այն է՝ հանելուկային հարցի:

Ճիշտ է, նրանք մեծ մասամբ չունեն այլևս հանելուկների նախնական ձևի սլարգոթյունն ու որոշակիությունը, սակայն բոլորն էլ պահպանել են հարցադրման եղանակը:

Այդպես են, օրինակ, հայկական հանելուկները: Նրանց մեջ արտադրման սկզբնական եղանակը իր դրսևորումն է գտել տարբեր հարցական բանաձևերի մեջ: Ամենատարածվածներից են. «էն ի՞նչն է», «էն ի՞նչ ա, ինչը», «էտ ի՞նչ ի», «ի՞նչն ա, ինչ», «ի՞նչի», «էն ինչ քե իսչ», «էն ո՞վ էր»:

Բանահավաքներից ոմանք երբեմն հանելուկներ են հրատարակել առանց հիշյալ բանաձևային հարցումների: Բայց այդ հանգամանքը դեռևս իրավունք չի տալիս ասելու, թե դրանք ասվել են առանց հարցումների: Նամանավանդ, որ բանահավաքների մի այլ խումբ էլ ժողովրդական հանելուկները տպագրել է հարցական բանաձևերով, կամ էլ, եթե ավելորդ տեղ չզբաղեցնելու համար յուրաքանչյուր հանելուկի սկզբից այն չի դրել. այնուամենայնիվ պարտք է համարել ծանոթագրության կարգով հիշեցնելու դրանց գոյության մասին (Տ. Նավասարդյան, Գ. Աղազատյան և ուրիշներ): Որ մեր ժողովրդի մեջ ամեն մի հանելուկ ասվել է որոշակի հարցումով, երևում է տարբեր բանահավաքների վկայություններից և մինչև այժմ ասորերը գավառներում պահպանված հանելուկներից:

Հանելուկ ասելիս, չնայած նրա նկարագրական բնույթին, ամացողը միշտ էլ ունկնդրին որոշակի հարցով է առաջադրում այն:

Այլ կերպ չէր էլ կարող լինել, որովհետև դիմացինին առաջադրվում է առարկաների հանդիմանների ու գծերի ուղղակի կամ այլաբանական մի այնպիսի կոմբինացիա, որին տրամաբանորեն պետք է պատասխան տրվի:

Հարցապնդման եղանակը հանելուկի ձևական առանձնահատկության ամենաընդհանուր արտահայտությունն է, որ գալիս է խոր հնությունից և կապվում է նրա բնորոշ գիծը:

Հետագայում որքան էլ փոփոխությունների է ենթարկվում նա, այնուամենայնիվ պահպանում է իր այդ սկզբնական կական¹ առանձնահատկությունը, իրերի և երևույթների մասին հարցումը:

Հարցահանելուկը ժողովրդական հանելուկների ամենաընդհանուր և միակ ձևն է: Ժողովրդական հանելուկներից էապես տարբեր են բոլոր այն հոգևոր խաղերն ու զվարճության միջոցները, որ կրում են «հանելուկ» ընդհանուր անունը:

* * *

Հանելուկը, ինչպես ասվեց, վիպական բանաստեղծության հնագույն և բաղկացուցիչ տարրերից է: Սկիզբ առնելով խոր հնադարում, այն բնականաբար պետք է հանդես գար մարդկության գեղարվեստական հայեցումների արտահայտության նախնական ձևերի շրջանակներում:

Արվեստի հին ձևերից մեկը սիմվոլիկան է, որը ծագել է Արևելքում և հանդես է եկել ու պահպանվել հին հնդիկների, պարսիկների, եգիպտացիների մոտ՝ նրանց սուրբ գրքերի (Ձենդ Նվեստա, Ռիգվեդա), հնամենի պոեմների (Ռամայանա, Մահաբհարաթա) և ճարտարապետական վիթխարի կառուցումների (բուրգեր, սֆինքսներ) մեջ:

Հանելուկը առնչվում է արվեստի այդ նախնական ձևի հետ:

Սակայն սիմվոլային արվեստի սկզբնական դրսևորումը՝ «չգիտակցված սիմվոլիկան» դեռևս հանելուկ չէր կարող առաջադրել, որովհետև հանելուկը ենթադրում էր որևէ ինչի իմացություն: Հանելուկը իրավամբ դասվում է գիտակցված սիմվոլիկայի բնագավառում: Այն ընդհանուրը, որ հանելուկը կապում է սիմվոլային արվեստի հետ, այդ նրա արտաքին կերպարի և ներքին իմաստի տարբերությունն է:

Սիմվոլի առանձնահատկությունն էլ այն է, որ մի կոնկրետ առարկայի միջոցով արտահայտելով մի ընդհանուր հասկացողություն՝ այդ առարկան կամ արտահայտության ձևը իր արտահայտած նշանակությունից մնում է տարբեր:

Ուստի հանելուկի առաջին ընդհանուր առանձնահատկությունը, որով և առնչվում է իսկական սիմվոլի հետ, նրա արտաբերական կերպարանքի և բուն նշանակության միջև եղած տարբերությունն է:

Այդ տարբերությունն առաջանում է նրանից, որ հանելուկի մեջ ներքին նշանակությունը ձևորէ բերում ինքնուրույնություն, որով կապը իր արտահայտության կամ հանելուկային արտաբերական պատկերի միջև խզվում է:

Այսպես օրինակ.

Մի տուն ունիմ, մեկ սյունանի,

Հարուր հագար տախտակ ունի (սունկ): է՛կժՈՒ 158*

Կամ՝ Կովը բռանշի. ֆորբը փախշի (հրացան): Ա՛Ն՝ XI 101 և այլն:

Սրանց մեջ հանելուկային պատկերները (մեկ սյունանի տուն, կով-հորթ) բոլորովին տարբեր են իրենց արտահայտած բուն նշանակությունից (սունկ, հրացան):

Սակայն պատկերի ու նշանակության այդ իրական բաժանումը այնուամենայնիվ ակնարկում է նրանց միջև մի ներքին կապակցություն: Այդ նմանությունը պատկերի և նշանակության մեջ անմիջականորեն առկա չէ, այլ մասամբ գտնվում է մեր սուբյեկտիվ հայեցողության մեջ: Հանելուկ հորինողը նմանության գծեր է գտնում միմյանցից հեռու ընկած պատկերի և նշանակության միջև: Այս իմաստով էլ հանելուկը դասվում է արվեստի համեմատելի ձևերի շարքը, որովհետև նրա արտաբերական կերպարանքի և բուն նշանակության միջև սուբյեկտը համեմատության կարգով է նմանություն գտնում: Այս մոմենտն է, անշուշտ, պատճառ, որ միևնույն հանելուկը հաճախ հանդես է գալիս տարբեր նշանակություններով: Այլ կերպ ասած՝ միևնույն հանելուկը մի քանի այլ առարկաների վերաբերյալ է ասվում: Այս դեպքում հանելուկ հորինողը նմանության գծեր է գտնում որևէ առարկայի և տվյալ հանելուկային պատկերի միջև, իսկ մեկ ուրիշը նմանություն է գտնում նույն պատկերի և բոլորովին այլ առարկայի միջև: Այնպես որ միևնույն պատկերը կամ արտաբերական ձևը հանելուկների մեջ կարող են արտահայտել տարբեր նշանակություններ, նայած ինչ կողմից է սուբյեկտը ընկալում դրանք:

Ու չի նշանակում հարկավ, թե այդ նմանությունները սոսկ սուբյեկտիվ հայեցողության արգասիք են: Այդ նման գծերը, անպայման, այս կամ այն չափով օբյեկտիվորեն գոյություն ունեն հանելուկային պատկերի և նշանակության միջև: Բայց դրանք այնքան ընդհանուր ձևով են արտահայտված, որ արտաբերական դժվար են զատորոշվում: Սուբյեկտիվ հայեցողությունը իր ճաշակի համապատասխան ընտրում է և առարկայի մնացած հատկանիշներից առանձնացնում այն կողմը, որը տվյալ դեպքում հետաքրքրում է իրեն՝ նմանություն տեսնելով նրա և հանելուկային պատկերի միջև:

Այդ նմանությունն է, որ պետք է հետաքրքրել հանելուկ լուծողը: Եվ հանելուկները մեծ մասամբ լուծվում են, որովհետև նմանությունը պատկերի և նշանակության միջև այնուամենայնիվ օբյեկտիվորեն գոյություն ունի, չնայած որ այն սուբյեկտիվորեն է ընտրված: Սուբյեկտիվ միզմի մոմենտը դրսևորվում է հատկապես հանելուկ հորինելիս, ճիշտ այնպես, ինչպես առհասարակ արվեստի տարբեր տեսակները ստեղծագործելիս:

Հեղելը հանելուկը դասում էր գիտակցված սիմվոլիկայի տեսակների շարքը. և այդ այն պատճառով, «որ հանելուկ հորինողը պարզ ու ամբողջությամբ զիտե ճրա նշանակությունը մինչդեռ իսկական սիմվոլները անլուծելի են»:

Հետևաբար, հանելուկի կական առանձնահատկություններից մեկը նախապես հորինողի կողմից նրա նշանակության իմացությունն է:

Հորինողը ազատ լինելով հանելուկի նշանակության ընտրության մեջ, նույնչափ ազատ է նրա արտաբերական պատկերի կերտման գործում:

Նա հանելուկային պատկերի համար օգտագործում է «արտաբերական աշխարհում մեզ նախապես ծանոթ առանձին բնորոշ գծերն ու հատկանիշները», որոնք «գտնվում են իրարից դուրս»:

* Համառոտագրությունների բացատրությունը տե՛ս հոդվածի վերջում.

Հանելուկ՝ հորինողն, ահա, այդ տարատեսակ գծերն ու հատկանիշները վերցնում և դասավորում է այնպիսի ձևով, որ նրանք իրենց անզուգահեռության շնորհիվ ավելի շատ են զարմացնում մեզ»¹:

Գծերի ու հատկանիշների այդ սուբյեկտիվ ու միտումնավոր միացումը արտաքինապես ոչ մի իմաստ չի արտահայտում: Սակայն ուշադիր նայելիս տեսնում ենք, որ ճերանք... այդ չափով էլ որոշակի ակնարկում են ինչ-որ միության գոյություն, որի կապակցությամբ նորից իմաստ ու նշանակություն են ստանում նույնիսկ այն գծերը, որոնց վերաբերյալ թվում է, թե նրանք միանգամայն տարասեռ են և իրար միջև ոչ մի բնդհանուր բան չունեն»²:

Ուրեմն արտաքին աշխարհի տարատեսակ գծերի ու հատկանիշների համակցումը դառնում է Հանելուկային պատկեր, որը շնայած իր արտասովորության, որոշակիորեն ակնարկում է որևէ առաքյալ, իր որոշ հատկանիշներով:

Առաջին օրինակ.

Մեր իրեք տարեկան, ուղիս բազարը զնաց (ղեղնի ձագ): ՍՇ XI 98

Պղինձը հալում ա, դմակը մերմ (ոտ և ոտնաման): ՍՇ XI 105

Քանի կտրեմ կ'երկնեա,

Քանի տաշեմ կը հաստեա (հոտ): ՍՄ 318 և այլն:

Բերած օրինակների մեջ զուգահեռում են մարդկային կյանքի ու կենցաղի այնպիսի գծեր, որոնք արտասովոր են և տարօրինակ (երեք տարեկան մայր, որի որդին շուկա է գնում, պղինձն է հալում, փոխանակ միջի դմակը, կտրելուց երկարում է և տաշելուց հաստանում): Ուշադիր դիտելիս հիշյալ արտասովոր երևույթների միակցումը իմաստ է ստանում և ակնարկում որևէ առարկայի որոշ հատկանիշներ: Ահա թայդ միությունը, այդ հանելուկային ցրված գծերի կրողը: Հենց այն հասարակ պատկերացումը, այն լուծման բառը, որի որոշումը կամ գուշակումը... հանդիսանում է այն խնդիրը, որ մեզ առաջադրում է հանելուկը³:

Հեզկը հանելուկի լուծման երևույթը համարում է նրա քայքայումը:

«...հանելուկը իրենից ներկայացնում է սիմվոլիկայի գիտակցված կատակ... որի արդյունքն այն է, որ նրա շարադրման եղանակը տանելով դեպի հանելուկային կոմբինացիայի գուշակումը, ինքն իրեն քայքայում է»⁴:

Այսինքն՝ հանելուկի հորինման մոմենտը սկիզբն է այդ կոմբինացիայի քայքայման, որովհետև հորինման տարբեր գծերի ու հատկանիշների միտումնավոր միավորումը ենթադրում է այն առարկան, որն ինքը հենց հանելուկի լուծումն է:

Այսպիսով, հանելուկը իրենից ներկայացնում է մի այնպիսի կոմբինացիա, որը բաղկացած է միմյանցից տարբեր երկու կողմից՝ հանելուկային պատկերից և ներքին նշանակությունից: Հանելուկ հորինելիս առաջնային՝ նրա նշանակության իմացությունն է և ապա արտաքին աշխարհից վերցրած որոշակի գծերի ու հատկանիշների միջոցով հանելուկային պատկերի կերտումը:

Տարբեր լինելով իր նշանակությունից հանդերձ, պատկերը որոշակիորեն ակնարկում է նրա հատկանիշները, որը և դառնում է հանելուկի լուծումը: Ըստ էության հանելուկը ինքն իր մեջ արդեն լուծված է, որովհետև հորինողը սկզբից բնորոշում է նրա գուշակման ենթակա նշանակությունը: Այլ կերպ ասած նախ լուծումն է ստեղծվում, հետո հանելուկը:

* * *

Արդ, ի՞նչ եղանակներով ու ձևերով է զրոսեորվում հանելուկի պատկերի և նշանակության փոխհարաբերությունը:

Հանելուկ հորինողը որպեսզի ստեղծի բուն նշանակությունից տարբեր հանելուկային պատկեր, պետք է առավել խնամքով ունենդիրներից թաքցնի հանելուկի՝ իրեն նախապես հայտնի նշանակությունը: Այս նպատակի համար նա օգտվում է կերպավորման զանազան միջոցներից: Գուշակման ենթակա հանելուկային պատկերի կերպավորման ամենատարածված եղանակը հայկական հանելուկներում այլաբանությունն է:

¹ Гегель, Сочинения. XII, էջ 405:

² Նույն տեղում, էջ 405—406:

³ Նույն տեղում, էջ 406:

⁴ Նույն տեղում:

Արտաքին աշխարհից վերցրած ծանոթ առարկաների հատկանիշներն ու գծերը կազմում են հանելուկային պատկերի այլաբանական աստղծր:

Հանելուկային այլաբանությունը առարկաների և երևույթների հատկանիշների այնպիսի դասավորություն է, երբ նրանց ներքին կապակցությունը, հանելուկի բուն նշանակությունից տարբեր, բոլորովին այլ դործողություն կամ երևույթ է արտահայտում:

Հանելուկային այլաբանական պատկերը իր բուն նշանակության հետ ունեցած փոխհարաբերության տեսակետից բաժանվում է մի քանի տեսակների:

ա) Այլաբանությունը ըստ արտաքին նմանության.

Այս տեսակի պատկերը շնայած իր բնույթով բոլորովին այլ կարգի երևույթ է արտահայտում, այսուհանդերձ նրա և բուն նշանակության միջև մի արտաքին ընդհանուր գիծ է նկատվում: Եթե մեծ մասամբ արտահայտվում է պատկերի և նշանակության առարկաների կամ երևույթների վիճակի ընդհանուր նմանությամբ:

Որինակ.

1 Ձին կնաց. քամիր մրնաց (շուր և կամուրջ): Դիմթ

2 Իրիկունը դրի մաղ մը հավկիր.

Վանկուց շկար հիշ մեկ հատիկ (երկնի լուսատուներ), և այլն:

Հանելուկներից առաջինի մեջ չորի հոսելու հատկանիշը այլաբանվել է ձիու գնալու հետ: Իրիկունի մոտ էլ արտաքին ընդհանուր նմանողությունը շարժման հանգամանքն է: Երկրորդի մեջ երկնքի շրջանաձևությունը այլաբանվել է կլոր մաղի, իսկ աստղերը իրենց փոքրության ու բազմաթիվության պատճառով՝ ձվերի հետ: Այս կարգի այլաբանական հանելուկները, առհասարակ, բավականին իմաստալից են և հաջող:

բ) Այլաբանության երկրորդ տեսակը կառուցված է հանելուկային և այլաբանական առարկաների ֆունկցիոնալ նմանողության վրա: Նման հանելուկները մեծ մասամբ իմաստալից են և գեղեցիկ:

Որինակ.

1 Ալ եզ, բալ եզ, Բանի Բուրձնմ, տաւ եզ (զգալ): ԷմժՁ 356

2 Ալ եզներ, պալ եզներ.

Շիվաբաժ կայնած եզներ (տան սյուներ). ԷմժԱ 156

3 Անհողի էջր անհող տանսի վերեն (նավի առաղաստ): ՎՍԲ 154

4 Ան շունը պատեն կալս (կողպեհ): ԺԱԲ 66 և այլն:

Առաջին հանելուկի մեջ հանելուկի առարկան՝ զգալը իր մի բան կրելու, տանելու հատկությունը պատճառով է այլաբանվել եզի հետ:

Երկրորդի մեջ սյուները, տան ծածկը իրենց վրա կրելու պատճառով են դարձյալ փոխաբերվել եզների հետ, բայց քանի որ անշարժ վիճակի մեջ են գտնվում, ուստի եզները դարձել են «շիվաբաժ կայնած», որով հանելուկային և այլաբանական առարկաների ներքին կապը իմաստավորվել է:

Նույն կրելու և տանելու հատկությունն է դարձյալ պատճառ հանդիսացել, որ երրորդ հանելուկի մեջ նավի առաջատար այլաբանվել է «անհողի» էջի հետ, որ անհող տանիքի վրա է դրվում: Ընդգծված այլաբանական բացառումները նախորդի նման, պատկերի և նշանակության ներքին կապն են իմաստավորել:

4-րդ հանելուկի մեջ դուռը պահպանելու հատկանիշը հիմք է ծառայել կողպեքը շան հետ այլաբանելու համար:

Այսպիսով, տեսնում ենք, որ հանելուկ հորինողի կողմից որքան էլ քմահաճ ու սուրյակտիվ մոտեցում ցուցաբերված լինի հանելուկի այլաբանական պատկերի ընտրության մեջ, այնուամենայնիվ որոշակի կապ ու փոխհարաբերություն է նկատի առնվում: Եվ այդ կապն ու նմանությունն է պատճառը, որ հանելուկը թեև դժվարությամբ՝ գուշակվում է:

Հանելուկների արտաքին պատկերի և նրա բուն նշանակության մասին խոսելիս, մի ընդհանուր երևույթ ևս պետք է նկատի ունենալ:

Երբ հանելուկի առարկան գործողություն է, շարժուն վիճակ կամ պրոցես, ապա այլաբանական պատկերը նույնպես գործողությամբ կամ շարժմամբ է արտահայտվում, և հակառակը, երբ անշարժ առարկա է կամ վիճակ՝ այլաբանական պատկերը ստատիկ է, անշարժ:

Բայց շատ հանելուկների մեջ լուծման առարկաները թվում են անշարժ, մինչդեռ այլաբանական պատկերները գործողություն են ներկայացնում:

Օրինակ, վերևում բերած հանելուկները գղալի, փականքի մասին, ինչպես նաև հետևյալների մեջ.

Սև սլիկը սառն ելավ.

Անհամբարբը վեր եկավ (ածելի և սագեր): ՀԺԱ 10

Երկու ծակեն սև (հեղեղ) կը վազե,

Հինգ ախպար տեմ կը վազե (ֆիթ): ԱՀ IX 179

Էն ի՞նչն ա ինչ,— Բանտը սարը բարձրացավ.

հագարավոր մարդ գլուխը (գերանդի): ԳԻԱԱ և այլն:

Հանելուկների մեջ շատ հաճախ առարկաները նկատի են առնվում ոչ թե իրենց արտաքին նկարագրով, իբրև սոսկ այդպիսիք, այլ իրենց կատարած հիմնական դերով: Բսկ քանի որ հանելուկի առարկաները վերցվում են մարդու շրջապատի իրականությունից, ապա բնական է, որ դրանց թե՛ մասը լինեն աշխատանքային ու կենցաղային զանազան գործիքներ ու իրեր, որոնք իրենց հիմնական ֆունկցիայով առնչվում են մարդու այս կամ այն գործողության հետ: Վերոբերյալ հանելուկների առարկաները՝ փականքը, գղալը, ածելին, գերանդին, քիթը ոչ այլ ինչ են, քան փակելու, ուտելու, սափրելու, հնձելու և այլ գործողությունների հիմնական միջոցներ:

Հենց նրանց այս ֆունկցիաներն էլ նկատի են առնվել ժողովրդական հանելուկներում: Հետևաբար այդ կարգի հանելուկների մեջ առարկան ինքը պրոցես կամ գործողություն է ցույց տալիս:

գ) Հանելուկային այլաբանության մյուս տեսակն այն է, երբ շրջապատի իրականությունից վերցրած գծերն ու հատկանիշները այնպիսի ձևով են զուգորդվում, որ հանելուկի այլաբանական պատկերը վեր է ածվում արտասովոր, անիրական, անտրամաբանական երևույթի կամ հասկացողության:

Նման այլաբանությունը կանվանենք՝ այլաբանություն հատկանիշների հակաբնական գույքողմամբ:

Այս տեսակը սովոր թիվ է կազմում հայ ժողովրդական հանելուկների ընդհանուր քանակի մեջ: Բերենք մի քանի օրինակ.

1 Միսը վրեն, կաշին տակը (հավի ֆաբանիկ): ԳԻԱԱ 102

2 Ամառը կպաղի, ձմեռը կբացվի (չորքան): ԱՀ IX 108

3 Էն ի՞նչն ա, որ կապրմ եմ ման ա գալի,

վեր եմ քողով քնքն ա (տրեխ): ԱՀ XI 107

4 Օրոցքի մեջ հինգ տղա կան,

Օրբուս՝ կուլան, թողես՝ կմնա (սագ): ԳԻԱՀ

5 Մի աման ունեմ, որ դպա երկինքն եմ բռնում՝ դարտրկվում ա.

Որ դպա դետին եմ բռնում՝ լցվում ա (զլխաբկ): ՀԺԱ 10

6 Էն ի՞նչն ա ինչը, որ մորթվող ոչխարը լազ չի բլրմ,

մորթող դասարն ա լազ բլրմ (սոխ): ԱՀ XI 106

7 Կավեն գնաց բաղնիք.

պոչը մնաց դուրսը (շերեփ): ԷԱԺԱ 156

8 Չորանը սարին.

կյուշը կտարին.

չոմաղը ֆակուրմ.

խոխեմ փորումը (խաշխաշ): ԳԻԱՀ

9 Էն ի՞նչն ա ինչը, ուղտը չոֆացրին,

մեքը նրազներ վառին (քոնի): ԳԻԱԱ և այլն:

Բերած հանելուկների այլաբանական պատկերները բոլորն էլ իրական երևույթներին հակառակ են և նույնիսկ անտրամաբանական (7, 8, 9): Դրանց մեջ առարկաների հատկանիշները թե՛ մասամբ դասավորված են հակառակ ձևով:

Իրական առարկաներին ու երևույթներին հակառակ հատկանիշների զուգորդումը հակասություն է առաջ բերում հանելուկի այլաբանական պատկերի և իրական առարկաների ու երևույթների միջև: Այդ հակասության մեջ էլ գրսևորվում է հանելուկայինը՝ այն հանգույցը, որը լուծում է պահանջում:

Իրականի և հանելուկային այլաբանության տարբերությունը ունկնդրի մոտ ստեղծում է միանգամայն այլ առարկայի մտապատկեր, որի մեջ արդեն հատկանիշների դասավորությունը

իսկ մոտավոր ճշտությամբ, համապատասխան է հանելուկի այլաբանական պատկերին: Այդ էլ հանելուկի առարկան է կամ բուն նշանակությունը:

Օրինակ, 5-րդ հանելուկի մեջ այլաբանական պատկերը ներկայացնում է մի այնպիսի աման, որը շրջելիս լցվում է, և ուղիղ պահելիս դատարկվում: Այս հակաբանական երևույթը ինքն է նշում նրա այլաբանություն լինելը և ունկնդրի մտքում առաջ է բերում այլ սեռի առարկաների մտապատկերներ, որոնք մոտավորապես օժտված են նույն կարգի հատկանիշներով: Դրանցից ամենահամապատասխանը գլխարկն է, որը և հանելուկի լուծումն է:

Այսպես են նաև մյուս հանելուկները: Այս առիթով ուշադրության է արժանի մի հանգամանք:

Իրական հատկանիշների հակաբանական դուգորդումը, որ կազմում է հանելուկի այլաբանական պատկերը, հաճախ ուղղակի կերպով չի մատնանշում այն առարկան կամ երևույթը, որի հատկանիշները դարձել են նրա կերպավորման: ասաղծր: Դրանք անուղղակի ձևով ենթադրվում են: Վերևի 3-րդ հանելուկի մեջ այլաբանական առարկայի անունը չի նշված, սակայն հատկանիշների բնորոշ լինելու պատճառով ենթադրվում է, որ գրկի երեխան է նկատի առնվել: Երկրորդի մեջ նույն հանգամանքների հետևանքով ենթադրվում է, որ այլաբանական առարկան սառույցն է: Կամ հետևյալ հանելուկները.

1 Ցերեկը խփվում ա, գիշերը բացվում (լամպ): ԳԻԱԱ

2 Բուն մը բնկա, կոլրտի, կոլրտի

Իրկուն բերան բաց կիզա տուն (կոշիկ): ԲԳ 264

3 Կը խրտրտեմ՝ լաց կը լինի.

Տափին դենմ՝ սուս կանի (սագ): ԺԱԲ 72 և այլն:

Բերված երեք հանելուկների մեջ էլ այլաբանական առարկաները չեն անվանված, բայց իրենց յուրահատուկ հատկանիշներով ենթադրվում են:

Առաջինի մեջ նկատի է առնվել աչքը, երկրորդի մեջ՝ շունը և երրորդում՝ ծծկեր երեխան:

Բերածից երկուսում է, որ որոշ հանելուկների այլաբանական պատկերի մեջ ոչ թե առարկաներից կտրված սոսկական հատկանիշներ են նկատի առնվում, այլ կոնկրետ առարկաներ: Հստորում համեմատություն է անցկացվում հանելուկային կամ լուծման առարկայի և այլաբանական առարկայի միջև:

Այս հանգամանքը բխում է հանելուկային առարկաների կոնկրետությունից:

Յուրաքանչյուր հանելուկի լուծում նկատի է առնում կոնկրետ առարկա և ոչ թե առարկաների մի ամբողջ սեռ կամ վերացական հասկացություն:

Ուստի կոնկրետ առարկան համեմատվում է մի այլ կոնկրետ, ուղղակի կամ հակառակ ձևով դուգորդված հատկանիշներով այլաբանական առարկայի հետ: Եվ քանի որ հանելուկը արվեստի համեմատելի ձև է, ապա բնական է, որ այդ համեմատությունը լինի կոնկրետ: Այդպես են բոլոր հանելուկները:

Այս իմաստով էլ սխալ են վարվել բոլոր այն բանահավաքները, որոնք տվյալ սեռի առարկաների որոշ հատկանիշների նույնությունը նկատի առնելով, հանելուկի տակ իբրև լուծում դնում են այդ առարկայի սեռի կամ տեսակի անունը¹:

Հանելուկի արտաքին պատկերի դրսևորման այլաբանական եղանակը միակը չէ:

Առարկաների հանելուկային դիմակը ձևավորվում է նաև նրանց իրական հատկանիշների նշմարիտ վերաբերման միջոցով:

Օրինակ՝

1 Մեկը կանգնած խոսում ա,

Էրկուսը անդամ ին դնում

Էրկուսն էլ մտիկ ին տալի (բերան, ականջներ, աչքեր): ԲԴԿ 117

2 Էտ ինչի, էրաս էս իկյալի.

Կայենս էս կայենի (ստվեր): ՓԳ X 44

3 Տյուսը կոկլեզ, մեշը պրպրբու (մասուր), ԳԻԱԾ

4 Տակե ջուր, վրան կրակ (նաբիլ): ԲԱ 654

5 Չուս կողմը ջուր, մեջտեղը հուր (հեշտաւն): ԳԻԱՆ

6 Ամառը հով տեղ ա սիրում, ձմեռը տա՛ տեղ (կատու): ԳԻԱԱ և այլն:

¹ Այսպես օրինակ.

Էն ինչն ա ինչ, դրսինը ուտենը, ներսինը բալենը (միրգ): ԳԻԱԱ

Կամ՝ Մերը երեք ամսական, որդին բազար գնաց (բանջարեղեն) և այլն:

Այս կարգի հանելուկների մեջ այլաբանությունն իսպառ բացակայում է: Քանի որ չկա այլաբանություն, չկա նաև այլաբանական առարկա: Դրանց մեջ առկա են միայն իրական հատկանիշներ: Հանելուկային առարկայի հատկանիշները կրող առարկայի անվան բացակայության մեջ է: Իսկ այդ առարկան ինքը հենց հանելուկի առարկան է կամ լուծումը: Այս տեսակը իր արտահայտության եղանակներով տարբերվում է նախորդներից: Սրանց մեջ հանելուկի արտաքին արտահայտությունը կամ պատկերը այլևս միջնորդված չէ մի ուրիշ առարկայով, այլ ուղղակի համապատասխանում է հանելուկի նշանակությանը:

Քերած հանելուկներից առաջինի մեջ անձնավորմամբ նշված են խոսելու, լսելու և դիտելու հատկանիշներ իրենց բանական գրանցումներով: Որով ճշմարտացի և ուղղակի վերարտադրված են մարդու բերանը, ականջներն ու աչքերը: Երկրորդի մեջ ուղղակիորեն վերարտադրված է «տվերի» մարդուն կառչած լինելու իրական հանգամանքը, իսկ մնացածները իրենց հանելուկային առարկաների ուղղակի և իրական նկարագրություններն են:

Վերևում տեսանք, որ հանելուկի հիմնական առանձնահատկությունը նրա պատկերի և նշանակության տարբերությունն է: Մինչդեռ հիշյալ տեսակի մեջ այդ տարբերությունը վերացված է: Հանելուկի երևույթն ու էությունը համապատասխանում են միմյանց: Այն միակ օղակը, որ այդ տեսակը կապում է դեռ հանելուկի հետ՝ առարկայի անվան բացակայությունն է, որը դեռ առիթ է տալիս գուշակման: Դրանք ավելի նոր ժամանակների արգասիք են, որոնց մեջ բացահայտ կերպով նկատվում է իսկական արվեստի տենդենցը՝ իմաստի և պատկերի համապատասխանեցման ձգտումը:

Սա արդեն հանելուկի զվարճալի վերածման արտահայտություններից է, որն իր բարձրագույն գրանցմանն է հասնում իրենց մեջ լուծումը պարունակող հանելուկներում:

Հայ ժողովրդական հանելուկների մեջ հանդիպում են բավական թվով այնպիսիները, որոնք շուտասուկայի կամ բառախաղի նմանությամբ՝ իրենք անվանում են իրենց լուծումը:

Այսպես օրինակ.

1 Ինքը կլուր, մեջը ծուկ.

ճիմաւ չըլնես՝ կասես ակ (ակ): ԳԻՂԲԿ

2 Ալաս, փալաս, անուր տամ չիմանաս (փալաս): ԳԻՂԲ

3 Խիցեւ (աֆղաղ), խիցեւ, տանսի խիցեւ.

Ինքը կեւ, հագին պիպեւ (աֆղաղ): ՀԺԱ 11 և այլն:

Սրանց մեջ արդեն հանելուկի բնորոշ հատկանիշները գրիթե բացակայում են. հանելուկի պատկերի և նշանակության միջև այլևս ոչ մի տարբերություն չկա. պատկերն ինքը հանելուկի իմաստն է:

Այստեղ հանելուկի միայն հեռավոր նմանություն կա, այդ այն է, որ հանելուկի ձև է կրում և դրանով իսկ ունկնդրի մոտ ակամա հանելուկի պատրանք առաջացնում:

Այս երևույթն արդեն հանելուկի բացակայումն է:

Այսպիսով, հանելուկի նշանակության և նրա արտաքին պատկերի միջև գոյություն ունեցող կապն ու փոխհարաբերությունը գրանցվում է ամենից առաջ հանելուկային առարկայի (— նշանակության) իրական որեւէ հատկանիշի կամ հատկանիշների վերարտադրման ձևով:

Այդ հատկանիշները հանելուկային պատկերի մեջ են գրանցվում երկու հիմնական եղանակներով.

ա) միջնորդված — այլաբանական պատկեր ունեցող հանելուկների մեջ, որտեղ նրանք հանդես են գալիս այլաբանական առարկայի հատկանիշների միջոցով՝ նրանց համեմատությամբ կամ հակադրությամբ:

բ) անմիջականորեն, ուղղակի — ոչ այլաբանական պատկեր ունեցող հանելուկների մեջ, երբ պատկերը ինքը հանելուկային առարկան է կամ նրա որեւէ հատկանիշը:

Վերևում տեսանք, որ հանելուկների այլաբանական պատկերը կառուցված է արտաքին աշխարհում սփռված մեզ ծանոթ իրերից ու երևույթներից վերցրած որոշ հատկանիշների հիման վրա: Այս իմաստով հանելուկը հատկանիշների յուրահատուկ դուգորդումն է: Այդ, հանելուկի պատկերի կամ կերպարի կառուցման մի քանի կական սկզբունքներ պարզաբանելու համար, տեսնենք

ա) հիմնական ինչ կարգի հատկանիշներ են դառնում հանելուկային կերպարի ատղծ.

բ) ինչ կոնկրետ կապ կա հատկանիշների տեսականների և հանելուկների նշանակությունների կամ լուծման առարկաների միջև:

Յուրաքանչյուր իր կամ երևույթ ունի իր որակական որոշակիությունը, այն էական գիծը, որով նա տարբերվում է շրջապատի իրականության բազմազան ու բազմաբանակ առարկաներից ու երևույթներից: Որակական այդ ներքին որոշակիությունը դրսևորվում է հատկանիշների յուրատեսակ կոմպլեքսի մեջ, որն իր ամբողջականությամբ բնորոշում է տվյալ առարկան:

Բայց այդ հատկանիշները միատարր ու միարժեք չեն: Առարկայի ներքին որակի հետ ունեցած հարաբերության տեսակետից նրանք բաժանվում են էական և ոչ էական խմբերի:

Էականն այն է, որն իր գոյությամբ պայմանավորում է առարկայի որակը. բավական է վերանա այդ հատկանիշը և իրր կղաղարի այդ իրր լինելուց, կվերածվի մի այլ որակի: Մինչդեռ ոչ էական կամ երկրորդական հատկանիշների վերանալուց առարկան չի կորցնում իր որակը և մնում է նույնը:

Քանի որ հանելուկը իրերի և երևույթների հատկանիշներ է վերարտադրում, ապա հետաքրքիր է պարզել դրանց տեսակը:

Ժողովրդական հանելուկների սովոր մասը այլաբանորեն կամ ուղղակի վերարտադրում է հանելուկային առարկայի երկրորդական կամ ոչ էական հատկանիշները: Այս հանգամանքը պատահական չէ:

Հանելուկ հորինողը միշտ ձգտում է մթագնել նրա նշանակությունը, որպեսզի լուծումը ավելի դժվարացվի: Մինչդեռ առարկայի էական հատկանիշը վերարտադրելիս հանելուկի նշանակությունը շատ կպարզվի ու լուծումը կհեշտանա, և դրանով իսկ նրա խորհրդավորությունը կվերանա և այլիս չի ծառայի իր նպատակին: Այս է պատճառը, անշուշտ, որ արտաքին աշխարհից բնորոշում են այնպիսի գծեր, որոնք մասնանշում են հանելուկային առարկայի ընդհանուր կարգի ոչ էական հատկանիշները: Այս ընդհանուր և ոչ էական բնույթի պատճառով էլ հանելուկի գուշակումն ավելի դժվարանում է:

Մյուս կողմից, դարձյալ նույն ընդհանուր բնույթի հետևանքով, այդ հատկանիշները կարող են հեշտությամբ վերագրվել այլ առարկաների, և այդ երկվությունն ինքնին ավելի է խճողում ու թաքցնում հանելուկի բուն նշանակությունը:

Բացի այս սուբյեկտիվ մոմենտից, պետք է նկատի ունենալ մի այլ՝ օբյեկտիվ հանգամանք:

Մարդու զեղարվեստական հայեցումների նախնական շրջանում, շրջապատի իրականության առարկաներն ու երևույթները աշխարհի դեռևս նոր ճանաչել սկսող մարդու վրա թողնում էին սոսկ արտաքին ընդհանուր պատկերի սպավորություն: Այստեղից սկսում է ծայր առնել մարդու պատկերավոր մտածողությունը բնության իրերի և երևույթների մասին:

Մտածողության այդ ձևը, որ միշտ էլ հարատևել է, դրսևորվում է նաև ժողովրդական հանելուկների մեջ, դառնալով նրանց այլաբանական պատկերի վերարտադրման կարևոր եղանակներից:

Ահա հանելուկային առարկաների արտաքին, առաջին հայացքից տպավորվող ընդհանուր, ոչ էական հատկանիշներն են, որ պատկերավոր ձևով ընկալվում են և վերարտադրվում հանելուկի մեջ:

Հետևաբար, մյուս կողմից, առարկաների և երևույթների ոչ էական, ընդհանուր, արտաքին հատկանիշների վերարտադրումը առնչվում է պատկերավոր մտածողության և իրերի ու երևույթների զեղարվեստական ընկալումների ընդհանուր տրադիցիաների հետ:

Ժողովրդական հանելուկների մեջ ընդհանրապես և հայկական հանելուկներում մասնավորապես, առարկաների բազմակողմանի բնութագրումներ չեն տրվում: Նրանց մեջ նկատի է առնվում առարկայի մի որևէ կողմը կամ հատկանիշը, որ ինչպես ասվեց, ոչ էական, երկրորդական նշանակություն ունի: Այդ միակողմանի վերարտադրությունն է պատճառը, որ միևնույն առարկայի վրա ասվում են տարբեր հանելուկներ, որոնցից յուրաքանչյուրի մեջ հաշվի են առնվել առարկայի այս կամ այն կողմը: Հետևաբար նույն առարկային վերաբերող տարբեր հանելուկները առարկայի տարբեր հատկանիշներն են մատնանշում:

Օրինակ, ընկույզի մասին մի քանի հանելուկ է ասվում. դրանցից յուրաքանչյուրի մեջ նկատի է առնվել ընկույզի երկրորդական որևէ հատկանիշը.

1 Բացեցիք վեր ընդա, ելն գալիս կուգա: ԱՀ XI 99

2 Մի բուռն, Լուկու հաց, մի ֆեթիմը: ԱՀ XI 99

3 Մուրը մառան, ջուխտ ավետառան: ԱՀ XI 99 և այլն:

Առաջինի մեջ նկատի է առնվել հասունացած ընկույզի ծառից վայր ընկնելու և կանաչ կեղևից զրկվելու երևույթը, երկրորդում՝ ընկույզի միջուկի երկփեղկված լինելը, երրորդի մեջ առկա է նույն միջուկի մի այլ պատկերավոր ընկալումը:

կամ՝ նուան մասին ասվող հետևյալ հանելուկները.

1 Նեղիկ, կլորիկ, մեջը հլուճով լիք: ԳԻԱՀ

2 Շուկայեն առա մեկ-մեկ, տուն տաբա հաճարումն: ԲԳ 451

3 Աստված կշարե, մարդը կհակե: ԲԱ 654

Առաջինում հաշվի է առնվել փոքր կեղևի մեջ նուան կլոր հատիկներ պարունակելու երևույթը. երկրորդում՝ մեկ նուան մեջ բազմաթիվ հատիկներ գտնվելը. երրորդի մեջ նուան հատիկների բնական շարվածքը մարդու կողմից քանդելը:

Հանելուկի մեջ արտահայտվում է առարկայի այս կամ այն կողմը կամ հատկանիշը, որ մեծ մասամբ առարկայի համար ոչ կական, երկրորդական նշանակություն ունի. բնական է, որ նա ունենա նաև իր արտահայտության որոշակի ձևերը՝ թեպետ ոչ բնականական ու վերջնական իմաստով:

Տարածված ձևերից է առարկայի որոշ կողմերի կամ հատկանիշների քանակական գրանցումը՝ բառիս ամենալայն առումով: Այն արտահայտվում է մի քանի ենթաձևերով: Ամենապարզ ենթաձևը առարկայի հատկանիշների թվական արտահայտությունն է: Օրինակ՝

1 Չորս կոխիչ, չորս կախիչ, երկու խփիչ, մեկ պտտիչ (կով): ԼԱԱ 316

2 Հիքսուն տուն մեկ սան վրա (վայրի մեղվի բույն): ԷԱԺԶ 346

3 Էն հի՞նչն ա, մին ֆիթ օնի, ֆառսուն աչք (տրեխ): ԳԻԱՆ

4 Մին փոսի երա, հյարուր փոս (մատնոց): ԳԻԱՇ

5 Մեկ քիզ արտ—ծալե ծալ, մեջն բուսած ա հագար ծառ (գլուխ): ԵԱ 125

6 Էն ի՞նչն ա—ինքն մին ա, միջինը հագար ու մին (սմբուկ և կորիզներ): ԳԻԱՀ 39 և այլն:

Բերված հանելուկների մեջ նկատի են առնվել առարկաների բնականորեն բնույթի արտաբերական հատկանիշները ըստ իրենց թվական արտահայտության: Նրանցից մեծ մասը (2—6) կառուցված է միավորի և բազմակի հակադրամիասնության վրա:

Հատկանիշների քանակական արտահայտության մյուս ենթաձևը չափի կամ տարածականության գրանցումն է: Հանելուկների այդ տեսակի հիմնական մասը կառուցված է մեծի ու փոքրի հակադրամիասնության վրա: Այսպես օրինակ.

1 Աշխարհի հորը հասնի կու, հավի պոչին չկարի հասնիլ (հանապարհ): ԱՏ 83

2 Մի ձիտ, մի տուն կը պսնե (բանալի): ԳԻԱՆ

3 Ինքն ունի, գորբն տուն մի (հրազ և լույս): ԲԳ 452

4 Բոնեմ բոնովս մին, վեք բողամ աշխարհովս միս (աչք): ԱՀ XI 96

5 Էն ի՞նչն ա ինչը—ձիուց բացրե ա, շանիցը ցած (ձիու բամբ): ԳԻԱՀ 38

6 Այն ի՞նչ է, ուղտից մեծ է, ձվից փոքր (բեկույզ): ԳԻԱՆ

7 Էն ի՞նչն ա ինչը—պրից մանդրանքմ ա, ամպից բացրանքմ (ծուխ): ԳԻԱՀ 42 և այլն:

Բերած հանելուկներից վերջին երեքի մեջ հակադրություն հատկանիշները (մեծ-փոքր) երևան են գալիս առարկաների տարբեր պայմանների մեջ գտնվելու հետևանքով:

Պատահում են նաև այնպիսի հանելուկներ, որոնց մեջ առարկայի մի քանի հատկանիշներ հանդես են գալիս միաժամանակ: Նման հանելուկները, որոնց քանակը շատ չէ, ամբողջական պատկերացում են տալիս լուծման առարկայի մասին: Բերենք մի քանի օրինակ.

1 Վրեն փետ, տակը ֆար, տասը ոտ, իրեք գլուխ (կամ, եղևեր, կավոր): ԳԻԱԲԱՀ 51

2 Էն ի՞նչն ա ինչը—վերեր ֆար, ներեր ֆար՝ մեջը հագար գլուխ կար (բաղնիք): ԳԻԱԱ

3 Գրսիցը խաս ա, միջիցը հզար (նուռ): ԱՀ XI 105 և այլն:

Սրանց մեջ առկա են որակական և քանակական հատկանիշների գույքորոշումներ, որոնք առավել ամբողջական են ներկայացնում հանելուկային առարկան: Հայ ժողովրդական հանելուկների մի փոքրիկ խումբ կա, որի մեջ առարկայի իրական և այլարական հատկանիշների գույքաորոշումներ են կատարվել: Այդ տարատեսակ հատկանիշների համադրմամբ հանելուկը ձևորեն ընդունում արտասովոր ու սարսփնական բնավորություն, որն իր ձևով գարմացնում է լսողին:

Այսպես օրինակ.

1 Դոմ մի ունիմ, հագար գլուխ օշխար կը տանի, մեկ խիլ խառ շտանի (մեջնի բույն): ԷԱԺԶ 344

2 Սաղ վախտը ոտի վրա ա ման գալիս, սատկելուս գլխի (փափախ): ԳԻԱԱ

3 Քանի սաղ էր՝ խոտ ու դաւման էր ուտում, որ մեռավ՝ գինի էր խմում (գինու տիկ): ՀԺԱ 18 և այլն:

Սրանց մեջ իրական առարկաները կամ նրանց որոշ հատկանիշներ (ամեկ խիլ խոտ», ոչ-խարի «սաղ վախտը ոտի վրա ման դար», այծի «սաղ վախտ խոտ ու դարման ուտելը») զուգորդված են այլաբանական հատկանիշների կամ առարկաների հետ («հազար գլխի ոչխար տանող գոմ», սատկած ժամանակ գլխի վրա ման դար, մեռած ժամանակ գինի խմել)։

Իրական և այլաբանական հատկանիշների այս զուգակապն էլ ստեղծում է արտասովորություն և հանելուկային դիմակ։

Միևնույն առարկայի մասին ասվող տարբեր հանելուկներին հակառակ, միևնույն հանելուկը կարող է ասվել տարբեր առարկաների վրա։

Այս դեպքում նկատի է առնվում առարկայի մի այնպիսի կողմը, գիծը կամ հատկանիշը, որը շատ բնդհանուր ոնույթ է կրում և այդ բնդհանրության պատճառով էլ կարող է վերաբերվել մի քանի առարկաների։

Օրինակ.

1 Ալալա, բալալա, տաւ խաղ աւաւ, բեր կախ աւաւ (մաղ)։ ԺԱԲ 72

Նույն հանելուկը անփոփոխ կամ աննշան փոփոխություններով ասվում է դանթարի (==ջրլուծ, ԵԱ 123), թմբուկի, սագի (ՀԺԱ 10) վրա։

Հիշյալ առարկաները, բացառությամբ վերջին երկուսից, սեռի, տեսակի կամ ֆունկցիայի իմաստով, միմյանցից շատ հեռու են։ Այդ տարատեսակ առարկաների մեջ միակ բնդհանուր գիծն այն է, որ դրանք բոլորն էլ օգտագործվում են մարդու կողմից և ապա պատից կամ առաստաղից կախվում։

Տարբեր առարկաների այս ձևական կողմի բնդհանրության պատճառով է միևնույն հանելուկը ասվել տարբեր առարկաների վրա։

2 Ասղին դաւ, անղին դաւ, մեշը կա անղադաւ (լեզու)։ ԲԳ 135

Այս հանելուկը բարբառային աննշան փոփոխություններով, տարբեր դավառներում ասվել է գետի (ԱՀ IX 108), օրորոցի (ԷԱԺՁ 345), խմորի կամ լվացքի տաշտի (ԳԻԱԱ), թրի (ԲԳ 470) վերաբերյալ։

Հանելուկային այս տարատեսակ առարկաների բնդհանուր գիծը շարժունակությունն է, որ սահմանափակվում է երկու կողմից արգելքներով։

3 Ես ու Ջիջոն զացիմ սաւ, Ջիջոն շրեղի (շիբեւ) կը մեւմ սաւ (լազան=փայտե ոտնոց)։ ԲԳ 696

Նույն հանելուկը ասվում է նաև ձեռնափայտի, աշքի, ոտքերի (ԷԱԺՁ 345) վերաբերյալ։

Իրանց մեջ նկատի է առնվել տարբեր հանելուկային առարկաների մարդու համար օգտակար լինելու հանգամանքը։

4 Տղա մը ունիմ, կերբա կոլովի, կոլովի, կիզե քիմին (դամաշափ), մի տեղ կառնե կը նստի (տեզ, նիզակ)։ ԲԳ 451

Այս նույն հանելուկը մասնակի փոփոխություններով ասվում է նաև շան (ՄՏ 1907, 393), դավազանի (ՄՏ 1907 393), կոշիկի (ԲԳ 264) վրա։

Այն բնդհանուր գիծը, որ երևան է գալիս այդ տարասեռ առարկաների մեջ՝ երկար թափառելու և երեկոյան տանը մի փոքրիկ տեղ գրավելու հանգամանքն է, որ հանելուկային փոխաբերության նյութ է դարձել։

Վերը շարադրածից հետևում է, որ ժողովրդական հանելուկները, ըստ իրենց կառուցվածքի, բաղկացած են երկու միմյանց պայմանավորող մասերից՝ հանելուկային պատկերից և նրա բուն նշանակությունից։

ՀՈՒՎԱՆՄՈՒՄ ԿԻՐԱՌՎԱԾ ՀԱՄԱՐԱՆՈՒՄԻՆԻՑՈՒՆՆԵՐԻ ՑԱՆԿ

1. ԱՀ IX — Ազգագրական հանդես, գիրք IX։
2. ԱՀ XI — Ազգագրական հանդես, գիրք XI։
3. ԱՏ — «Արարատ», ամսագիր, 1895։
4. ԲԱ — «Բյուրակն», շաբաթաթերթ, Կ. Պոլիս, 1898։
5. ԲԲ — «Բյուրակն», շաբաթաթերթ, Կ. Պոլիս, 1899։
6. ԲԳ — «Բյուրակն», շաբաթաթերթ, Կ. Պոլիս, 1900։
7. ԳԻԱԱ — Մ. Աբեղյանի անվ. Գրականության ինստիտուտի ժողովրդական բանահյուսության արխիվ, Գ. Աղազատյանի ֆոնդ։
8. ԳԻԱԲԱ — Նույն տեղ, Վ. Բոդյանի ֆոնդ, «Ֆոլկլորը Ախուրյանի շրջանում»։

9. ԳԻԱԲԱՂ — նույն տեղ, Վ. Բղոյանի ֆոնդ, «Ֆուկլորը Աղինի շրջանում»:
10. ԳԻԱԲԲ — նույն տեղ, Վ. Բղոյանի ֆոնդ, «Ֆուկլորը Բոզդանովկայի շրջանում»:
11. ԳԻԱԲԿ — նույն տեղ, Վ. Բղոյանի ֆոնդ, «Ֆուկլորը Բոզդանովկայի շրջանում»:
12. ԳԻԱԹ — նույն տեղ, Գ. Թարվերդյանի ֆոնդ:
13. ԳԻԱՀ — նույն տեղ, Մ. Հակոբյանի ֆոնդ, «Հոռվա ֆուկլոր»:
14. ԳԻԱՀՋ — նույն տեղ, «Հանելուկներ և ջանգլույուններ Լենինականի»:
15. ԳԻԱՆ — նույն տեղ, Տ. Նավասարդյանի ֆոնդ:
16. ԳԻԱՇ — նույն տեղ, Կ. Մելիք-Շահնազարյանի ֆոնդ:
17. ԵԱ — Երզնք, հանելուկներ, թերահավատություններ... Խոտրչրո, Գավառացի, Տիֆլիս, 1903:
18. ԷԱԺԱ — Էմինյան ազգագրական ժողովածու, հատոր Ա, Մոսկվա — Ալեքսոլ, 1901:
19. ԷԱԺԶ — Էմինյան ազգագրական ժողովածու, հատոր Զ, Մոսկվա-Վարդապետ, 1906:
20. ԹԼԿ — Թիֆլիսեցուց մտավոր կյանքը, Գ. Տեր Աղեքսանդրյան, մասն Ա, Թիֆլիս 1885:
21. ԺԱԲ — Ժողովրդական անգիր քանաստեղծություններ, ժողովեց Տիգրան Վարդանյանց, Թիֆլիս, 1900:
22. ԼԵԱ — «Լուսա», գրական հանդես, Ե տարի, 1900, գիրք Ա:
23. ՄՏ — «Մաղիկ», շաբաթաթերթ, տղոց և դպրոցականներու հատուկ, Կ. Պոլիս, 1907:
24. ՀԱՄ — «Հանդես ամսօրյա», Վիեննա, 1930:
25. ՀԺԱ — Հայ ժողովրդական ավանդություններ, ժողովածու Տիգրան Նավասարդյանց, առաջին գիրք, Երևան, 1883:
26. ՍՄ — Մանանա, ժողովեաց և ի լոյս լած Գ. Վ. Սրուանձուկանց, Կ. Պոլիս, 1876:
27. ՎԱԱ — Վանա Սազ, Ա մաս, ժողովեց Գեորգ Գ. Շերենց, Թիֆլիս, 1885:
28. ՎՍԲ — Վանա Սազ, Բ մաս, ժողովեց Գեորգ Գ. Շերենց, Թիֆլիս, 1899:
29. ՓԳ — «Փորձ», միամսյա հանդես, Տիֆլիս, 1879:

О НЕКОТОРЫХ ОСОБЕННОСТЯХ НАРОДНЫХ ЗАГАДОК

С. Б. АРУТЮНЯН

(Р е з ю м е)

Рассматривая загадку в ее историческом развитии как древнейший жанр народно-поэтического творчества, автор статьи находит, что первоначальным видом загадки была вопрос-загадка, существенный признак которой сохранился в армянских загадках как вопрошание о предметах и явлениях внешнего мира. Вопрос-загадка сопровождалась различными вопросительными формулировками.

Считая загадку формой сознательной символики, автор свое основное внимание обращает на взаимную связь ее внутреннего значения и внешнего выражения или образа, подробно разбирая различные способы выражения этого своеобразного соотношения. Они в основном выражаются в двух видах: а) в опосредованном — в загадках, имеющих иносказательный образ, в которых разгадка выражается признаками иносказательного предмета, путем сравнения или сопоставления; б) в непосредственном — в загадках, имеющих неиносказательный образ, когда образ сам по себе является предметом разгадки или одним из его признаков.

Загадки, в основном, воспроизводят признаки второстепенного или общего характера действительных предметов или явлений, благодаря чему создается двусмысленность и затрудняется их решение.